



Pou Piblikasyon Imedya: 12/08/2023

GOUVÈNÈ KATHY HOCHUL

## GOUVÈNÈ HOCHUL BAY NOUYÒKÈ YO MIZAJOU SOU EFÒ KONTINYÈL ETA A POU BAY ABRI AK SIPÒTE MOUN K AP CHÈCHE AZIL YO

*Nan kad angajman 1 milya dola a, Gouvènè Hochul avanse 250 milyon dola bay Vil New York pou ranbouse depans ki gen rapò ak èd pou moun k ap chèche azil*

*Pèsonèl Eta a te kowòdone vizit federal nan Floyd Bennett Field, Fort Wadsworth epi yo pral rankontre ak responsab Depatman Enteryè Ameriken yo demen, ki baze sou reyinyon pwodiktif ant Gouvènè Hochul ak Konseye Prensipal Mezon Blanch Tom Perez*

*Sit Eta a nan Sant Koreksyonèl Lincoln ak Ayewopò JFK yo kounye a bay abri a moun k ap chèche azil yo, sit ki jwenn finansman eta a nan Creedmoor ak Zile Randall pral akeyi moun k ap chèche azil semèn sa a*

**Gouvènè Hochul pral deplwaye lòt pèsonèl Gad Nasyonal nan Konte Erie pou bay sipò lojistik ak operasyonèl pou sit abri yo**

Gouvènè Kathy Hochul jodi a te mete Nouyòkè yo ajou sou efò kontinyèl yo ap fè pou sipòte moun k ap chèche azil yo, ede yo jwenn abri, epi konekte yo ak sèvis sosyal enpòtan yo pandan y ap rive nan New York. Sa enkli 250 milyon dola nan finansman yo déjà voye bay vil la, pwogrè ki soti nan defans kontinyèl avèk gouvènman federal la, ak deplwaman Gad Nasyonal adisyonèl.

"Depi lè moun k ap chèche azil yo te premye rive nan New York, nou te bay èd imanité enpòtan pandan Vil New York ap travay pou satisfè obligasyon legal yo pou bay abri", **Gouvènè Hochul te deklare**. "Nou pral kontinye efò nou pou bay sipò finansye, ekip ak ekipman, epi kontinye defann asistans federal".

Kòm yon pati nan 1 milya dola nan finansman Gouvènè Hochul te garanti nan bidjè eta 2024 la, Gouvènè a te avanse 250 milyon dola bay vil la pou ranbouse depans yo; sipò finansye sa a pral kontinye pandan vil la ap kontinye fè lòt depans finansye. Peman 250 milyon dola bay Vil New York la pral sèvi pou sipòte finansyèman Sant Repons ak Sekou pou Ijans Imanità (Humanitarian Emergency Response and Relief Centers, HERRC), sit sanktyè, ak lokatè relèv yo, ansanm ak sant akèy, admisyon ak navigasyon ki bay asistans imedya pou moun k ap chèche azil yo.

Finansman nan bidjè ane fiskal 2024 la bay Vil New York yon ranbousman 29 poustan pou depans ki otorize ki asosye ak fonksyònman pwogram sa yo. Depans ki kalifye yo enkli, men yo pa limite sèlman a:

- Anplwaye, sekirite, antretyen, ak netwayaj
- Sèvis sosyal enpòtan yo bay nan sit pwogram yo
- Depans pou abri, manje, ak founiti oswa sèvis pèsonèl (tankou rad, dra, atik ijayèn, kabann, kouchèt, sèvis lesiv, elatriye)
- Transpò ak sèvis entèpretasyon
- Founiti ak asistans enfòmatik

Yon envestisman 25 milyon dola te enkli nan didjè ane fiskal 2024 la pou volontèman deplase 1,250 fanmi – apeprè 4,375 moun – ki te deja aplike pou azil; finansman sa a se pou ajoute sou plis passe 700 milyon dola nan bidjè ane fiskal 2024 la ki te atribiye pou abri tanporè nan otèl ak sit abri an mas yo. Nan moman sa a, vil la idantifye 17 fanmi ki vle patisipe epi ki elijib pou patisipe epi ki nan pwogram sa a Eta a finanse, epi Eta a ap kontinye sipòte demenajman pou lòt fanmi pandan y ap patisipe nan pwogram nan. Patisipan yo nan pwogram sa a, ki sou wout pou yo jwenn otorizasyon travay nan peyi Etazini, pral demenaje epi yo pral asosye ak ajans sèvis sosyal yo ki ka ede yo ajiste ak reyentegre pandan Eta New York peye pou lwave yo.

Anplis reyinyon Gouvènè Hochul te fè ak Tom Perez, Konseye Prensipal ak Asistan Prezidan Etazini an, responsab federal yo te ogmante asistans yo bay New York nan semèn ki sot passe yo apre plizyè mwa Gouvènè Hochul ak lidè lokal yo te passe ap defann sa. Responsab eta, federal ak vil yo te vizite sit gouvènman federal yo nan Floyd Bennett Field ak Fort Wadsworth pou evalye si yo apwopriye pou yo resevwa moun k ap chèche azil yo. Responsab Administrasyon Hochul yo pral rankontre tou ak responsab Depatman Enteryè Ameriken an demen pou diskite sou tè gouvènman federal la posede ki ta ka apwopriye pou itilize kòm abri.

Gouvènè Hochul te anonse tou deplwaman lòt pèsonèl ak resous Gad Nasyonal New York nan sit moun k ap chèche azil nan Konte Erie. Deplwaman nan Konte Erie a baze sou plis passe 1,800 pèsonèl Gad Nasyonal ki kounye a ap bay sipò lojistik ak operasyonèl nan abri yo nan Vil New York. Plis passe 30 nan sit abri ki baze nan otèl Vil New York yo gen kòm anplwaye sèlman pèsonèl Gad Nasyonal Eta New York ak 18 lòt ki gen anplwaye prensipalman atravè pèsonèl Eta sa yo.

Yon sit abri sou tè eta a nan Sant Sikyatrik Creedmoor (Creedmoor Psychiatric Center) nan Queens pral ouvri semèn pwochèn epi li pral gen kapasite pou loje jiska 1,000 moun k ap chèche azil, epi yon sit abri ke Eta New York peye totalman pou li pral ouvri byento sou zile Randall la. Eta a te deja prete sit Vil New York yo nan ansyen Etablisman Koreksyonèl Lincoln nan Manhattan ak nan yon bilding eta a nan Ayewopò JFK nan Queens, tou de lokal yo te ouvri nan mwa jen epi yo te loje plis passe 1,000 moun k ap chèche azil chak jou.

###

Lòt nouvèl disponib sou sit [www.governor.ny.gov](http://www.governor.ny.gov)  
Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418